

Date – 18/10/2025

Time - 7:30 Hrs

HEADLINES (MORNING)

1. Chief Minister Pu Lalduhoma hovin Tlawng lui humhalhna leh tui hna tih chak lehzualna tur inrawnkhawmna neih a ni.
2. Ramchhunga sawrkar damdawi in tha bik tehnaah Primary Health Centre pathum – North Vanlaiphai PHC, Rabung PHC, leh Farkawn PHC te an tling thar leh .
3. Prime Minister Narendra Modia chuan vawiina India ram chu hmasawn zawngin chak takin a kal a, chawlh emaw muangchan hlek emaw a tum lo a ti.
4. Nimin khan Chhatisgarh-a Jagdalpur ah Naxal hel 200 chuang sawrkar kutah an inpe

<><><>

REVITALISING TLAWNG RIVER

Irrigation & Water Resources Department bultuma Tlawng lui humhalhna leh tui hna tih chak lehzualna tur,’ ‘REVITALISING TLAWNG RIVER THROUGH SPRINGSHED MANAGEMENT & ALLIED STRATEGIES’ kalpui dan tur chungchanga inrawnkhawmna nimin khan neih a ni a. Chief Minister Pu Lalduhoma chuan he hun hi hmanpuin Public Health Engineering Department, Irrigation & Water Resources Department leh IIT Roorkee buatsaih hmalak dan tur an duan te en ho a ni.

Chief Minister Pu Lalduhoma chuan Brahmaputra Board leh IIT Roorkee-te nen Mizoram Sawrkar chuan thawhhona tha tak a kalpui mek thu sawiin, Mat lui zirchianna, nungchate humhalhna, lui dunga eizawna siam leh lui dung inkalpawhna tha siamna turin ‘Mat Valley Integrated Water Resource Management and Climate-Resilient Irrigation Project’ kalpui mek a nih thu a tarlang a. Lui luan dan leh an dinhmun dik tak hriat theihna turin ‘State Water Informatics Centre’ pawh a taka kalpui mek a nih thu a sawi bawk a ni.

Chief Minister chuan tui hna leh lui humhalh kawngah hmalakna hrang hrang awm thin mahse, khawpui thang zel avanga kan tui mamawhna a pun zel avangte, ram ngaw thiah avangte leh sik leh sa inthlak danglam nasa avangtein Tlawng lui pawh nasa takin a nghawng mek thu a sawi a. IWRD, Brahmaputra Board, PHED leh IIT, Roorkee tangkawp ruahmanna hian Tlawng lui leh a fintu lui te zawk humhalhna huang zau zawka kalpuina tur a nih angin, Tlawng lui leh a chhunga cheng nungchate humhalhna leh hmasawna inbuktawh thlen tirna kawngah hmasawna nasa zawk a thlen ngei a beisei thu a sawi a. Mizoram Sawrkar chuan hemi kawnga hmalakna chak zawka kalpui a nih theih nan ‘Mizoram (Protection of Rivers) Act, 2023’ chu a lo pawm tawh tih a sawi.

Pu Lalduhoma chuan leilung hausakna, a bik takin tui chu hausakna intawm a nih thu tarlangin, Tlawng lui humhalhna leh a chawmtu tui hna tihchakna chuan kan thenawm state chawmtu pawimawh tak, Barak River Basin-te pawh a tha zawngin a nghawng zel dawn, tih a sawi a. Brahmaputra Board, India–EU Water Partnership leh KfW (Germany) tangkawpin Barak River Basin Management Plan an kalpui hian thawhhona leh tanrualna neih a pawimawh zia a tihchian thu sawiin, Tlawng leh Mat River Project tih hlawhtlinna tur hian kalkhawmte chu thawhhopui ah a sawm a.

Tui thianghlim hnianghnar tak Mizoramin a neih theih nan he hmalakna thuthlungah I-pathum; Integration, Innovation leh Involvement tih chu hman a nih tur thu a sawi.

Tlawng lui humhalhna tura inrawnkhawmna hunah hian Sawrkar Department hrang hrangte bakah MZU, CYMA, Save the Riparian, Centre for Environment & Social Justice, Project Save Tlawng aiawhte an tel a ni.

<><><>

CHAMPHAI DISHA MEETING

Champhai District Development Co-ordination and Monitoring Committee (DISHA) chu an Chairman, Pu Richard Vanlalmangaiha, Lok Sabha MP hovin nimin khan Champhai DC Conference Hall-ah an thukhawm a,

Lok Sabha MP Pu Richard Vanlalmangaiha chuan India sawrkar hmathlir Bharat Vikshit 2047 atana India pumpui development a thlirnaah DISHA hi a pawimawh em em, developing atanga developed ni tur chuan district tin hma a sawn a ngaih avangin DISHA atang hian India ram hma kan sawn tan thei a ni tih a sawi. Heng scheme kalpuitu department hotute chu theih tawp chhuah theuh turin a sawm a, thawhhona tha tak a awm chuan Champhai hi an chawisang ngei ang tih a rin thu a sawi bawk.

He thutkhawmah hian department hrang hrang - Rural Development, FCS&CA, Health & Family Welfare (CMO), PWD, Irrigation & Water Resources, PHE, Agriculture, Education, Commerce & Industries, Animal Husbandry & Veterinary Sciences, Land Resources, Soil & Water Conservation, Fisheries, Social Welfare, Women & Child Development, Land Revenue & Settlement, Horticulture, LAD, UD&PA, Telecommunications (BSNL), Lead Bank, NHIDCL - hnuaia scheme leh programme kalpui mek te department hotute'n an sawifiah a, department hotute'n zawhna te zawtin an chhang bawk. Hmalakna an kalpui dan te, hmachhawp an neih te leh scheme hrang hranga hlawhtlinna an lo neih tawh te an tarlang a ni.

Champhai DISHA thutkhawmah hian Champhai Bawrhsap leh DISHA Member-Secretary ni bawk Pu Mohammad Aaquib, DISHA member te, department hotute, VC member te leh khawtlang hruaitute an tel a ni.

<><><>

PHC CERTIFICATION

Ramchhunga sawrkar damdawi in tha bik tehnaah Primary Health Centre pathum – North Vanlaiphai PHC, Rabung PHC, leh Farkawn PHC te an tling thar leh a, heti hian Mizoram chhunga HWC-PHC 57 target awm zinga 39-in National NQAS certificate an nei tawh a ni.

National Health Mission, Mission Director Dr. Lily Chhakchhuak chuan India rama sawrkar damdawi in tha bik tehna, National Quality Assurance Standards (NQAS)-a tling thar North Vanlaiphai PHC in zaa 92.63, Rabung PHC in zaa 86.68, Farkawn PHC zaa 80.78 an hmu tih a sawi.

Heti hian Mizoram chhunga Sawrkar damdawi in 52 te chu NQAS national certificate nei tawh an ni a. Tunah hian sawrkar damdawi in 15 leh HWC Sub-Centre 21-in state level certificate nei tawhin national-level assessment an dil mek a ni.

National Quality Assurance Standards certified damdawi in te hi endikna chhawng thum paltlang an ni a, a tawp bera endikna an hmachhawm hi National External Assessment a ni a, state pawn atangin endiktu an lo kal thin a ni. Hetah hian a tehnaa zaa 70 an hmuh tlin chuan certified an ni chauh thin. Heng certified tawh damdawi inah te hian natna darh thei ven kawngah te, thawktu zawng zawngte an hna bil an thiamna te, an level zelah enkawlina an pek that dan te, a thlawna enkawlina leh damdawi pek te, damdawi in faina leh dik taka damdawi in bawlhhlawh sawngbawl te, hawihawmna leh a chhehvel vawnfai kawngah te, environment vawn that kawngah te endik an ni.

Mission Director, Dr. Lily Chhakchhuak chuan India rama Damdawi in tha tehna a tling thei tura thawktu State Quality Assurance Unit, SNO leh Staff te, Champhai, Khawzawl leh Serchhip District CMO leh Staff zawng zawng te, leh Dr. C. Vanlalhruaia, MO, North Vanlaiphai PHC, Dr. Lalthangpuii, MO, Rabung PHC, leh Dr. Vanlalruata, MO, Farkawn PHC leh Staff zawng zawng te thawhrimna chu fakawm a tiin lawmthu a sawi a. Heng NQAS certified sawrkar damdawi in kan neih tak te hi mipuite'n tangkai taka an hman a duhsak a, mipuite pawhin tangkai taka hmang turin a chah bawk.

<><><>

HNAHTHIAL DTO OFFICE

Hnahthialah Transport Department Minister Pu Vanlalhlana'n District Transport Office (DTO) nimin khan a hawng a. Minister chuan tui lama inkalpawhna tur- Inland Waterways Transport-ah hma an lak tan mek thu a tarlang.

Minister chuan Hnahthial District DTO Code - MZ-11 chu Hnahthial mipuite tan a tlangzarh nghal a. Recruitment, digitization leh thil hrang hrang buaipui ngai avangin duh angin an rawn hawng hma thei lo chu mipuite hriatthiamna a ngen a. DTO office hawn tak hi mipuite, a bikin lirthei khalh turte harsatna tam tak sukiangtu a nih a besei thu a sawi bawk. Mipuite tana thil lawmawm tak a nih rualin dan zawm lo te tan thil huphurhawm tak tur a nih tur thu a sawi a. Chuvangin lirthei neitute chuan buaina an tawh loh nan license leh lehkha pawimawh dang chu dan in a phut angin, felfai tak nei thin turin a chah a ni.

Minister chu Inland Waterways Transport nei turin tui khuah sa na hmun pahnih - Serlui B leh Tuirial te chu an thilthlai mek thu a tarlang a. Tunah hian Central lamin an rawn enfiah tawh thu leh hmalak zui dan tur ngaihtuah mek a nih thu a tarlang.

He hunah hian Transport Department Director, Pu R. Lalrammawia chuan kum khat chhung chu motor registration DTO Code MZ-02 atanga MZ-11 a thlak duh te tan hun an hawn tur thu a tarlang a. Thlak duh tan Lunglei DTO atangin No Objection Certificate (NOC) lak mai tur a nih thu a tarlang bawk.

Hnahthial DTO hi Lungleng Veng, Lalnu Ropuiliani Hall bulah awmin SDO (Civil) office building hlui thuam thain an luah lut a, Staff pakua (9) awm tura ruahmanna siam a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan vawiina India ram chu hmasawn zawngin chak takin a kal a, chawlh emaw muangchan hlek emaw a tum lo a ti.Private Media house pahatin Summit a buatsaihah he thu hi sawiin Pu Modia chuan ramchhung mi cheng vaibelchhe 140 chuangte hian tangrualin ram hmasawinna an nawrkal dawn tih a sawi a. Khawvelin harsatna leh buaina a tawk mek karah India chuan dan rualloha hma a sawnna chu sawi a tling a ti bawk. Pu Modia chuan India chu khawvelin ram rintlak,mawhphurhna la leh thawhpui rinawmah an hmu vek tawh a ni a ti bawk.

<><><>

NAXAL

Nimin khan Chhatisgarh-a Jagdalpur ah Naxal hel 200 chuang sawrkar kutah an inpe. Vawiina Naxal inpete hian silai 153 an tung a. Heng zingah hian AK-47 19 leh SLR rifle 17 a tel a. Nimina Maoist hel inpe te zingah hian an hruaitu pawimawh tak takte pawh an tel a. Chhatisgarh Chief minister Vishnu Deo Sai chuan hel inpete chhawmdawlna leh intunnunna turin sawrkar chuan theithawpin hma a la tih he hunah hian a sawi bawk a ni.

<><><>